

27/10/1999

Dr Mahathir sedia beri keterangan

KUALA LUMPUR, Selasa - Datuk Seri Dr Mahathir Mohamad sedia memberi keterangan dalam perbicaraan Datuk Seri Anwar Ibrahim jika beliau diminta menjawab soalan dan mengemukakan bukti berkaitan kes liwat.

Bagaimanapun, Perdana Menteri menegaskan, peguam Anwar tidak mempunyai hak untuk memanggilnya memberi keterangan di mahkamah jika soalan mereka tiada kena mengena dengan kes liwat yang sedang dibicarakan.

"Saya ingin tahu soalan yang hendak mereka tanyakan. Jika soalan yang hendak dikemukakan ialah mengenai konspirasi atau arsenik, saya tidak fikir mereka mempunyai hak untuk memanggil saya ke mahkamah.

"Jika saya boleh memberi keterangan untuk menunjukkan perbuatan liwat itu berlaku dan Datuk Seri Anwar terbabit, maka saya akan hadir di mahkamah," katanya.

Dr Mahathir menegaskan demikian ketika ditanya pemberita sama ada beliau akan menghadiri perbicaraan liwat Anwar pada Khamis ini seperti diperintahkan oleh Mahkamah Tinggi Kuala Lumpur baru-baru ini.

Beliau ditanya mengenai perkara itu pada sidang akhbar selepas merasmikan Forum Perniagaan Afrika-Asia di sini hari ini.

Perdana Menteri berkata, beliau tidak pasti sama ada peguam Anwar sudah mengemukakan sepina terhadapnya supaya hadir ke mahkamah. Bagaimanapun setakat ini, katanya, beliau belum menerima sepina itu.

Sebelum ini, peguam Anwar mengemukakan permohonan untuk memanggil Dr Mahathir untuk memberi keterangan di mahkamah dalam perbicaraan kes penyalahgunaan kuasa oleh Anwar.

Dr Mahathir berkata, peguam Anwar mengemukakan satu senarai soalan yang memerlukan jawapan daripadanya.

Bagaimanapun, setelah Perdana Menteri memberi persetujuan untuk hadir di mahkamah, peguam Anwar memutuskan tidak jadi memanggilnya.

Anwar, 52, dan adik angkatnya, Sukma Darmawan Sasmitaat Madja, 38, dibicarakan bersama terhadap tuduhan meliwat Azizan Abu Bakar, 39, di apartmen Sukma di Tivoli Villa, Bangsar di sini, pada satu malam jam 7.45, antara Januari dan Mac 1993.

Sukma juga dituduh bersubahat dengan Anwar untuk meliwat Azizan, bekas pemandu peribadi isteri Anwar di tempat dan pada masa yang sama.

(END)